

Autor Julien Ignacio ta presenta 3 buki, 'Goudjakhals', 'Kus' y 'Dat wij zongen'

Autor y specialista literario Julien Ignacio ta presenta 3 buki na Biblioteca Nacional Aruba. E 3 obranan ta titula 'Goudjakhals', 'Kus' y 'Dat wij zongen'. E presentacion ta tuma luga dialuna dia 25 di november pa 5or. Un invitacion ta bay pa un y tur.

Julien Ignacio (1969) ta skirbi y publica, entre otro, storia cortico, articulo, novela

y texto pa teatro. Ignacio a studia ciencia di literatura y a traha como docente y e ta redactor na Hulanda. 'Goudjakhals' ta un coleccion di storia di migrantenan cu ta laga nan bos resona. Cada bos ta un buskeda personal pa libertad y ta duna un cara na e hendenan cu ta purba di establece nan mes den un pais stranhero. E storianan ta hiba e lector na diferente pais, situacion y personahe den tur tempo. 'Kus' ta un

novela cu ta trata di un tata cu ta haya contacto bek cu su yiu despues cu esaki a sufri un caida lamentabel y a bay den coma. 'Dat wij zongen' ta un antologia di storia di binti autor Caribeño contemporaneo. Storianan tocante autornan Caribeño di epocanan anterior cu nan ta admira y cu a inspira nan. E ultimo publicacion Ignacio a produci hunto cu Raoul de Jongh y Michiel van Kempen.




Jaidyleen Tromp Miss Teen Aruba International a keda como 1e Finalista na Nuestra Belleza International 2024

Algun siman atras Aruba su representante hubenil Jaidyleen Tromp (Miss Teen Aruba Intl 2024) a sali pa Punta Cana pa representa Aruba na Nuestra Belleza International den e di 5 edicion di e concurso.

Jaidy a biaha cu su mayornan, ruman, preparador y tambe

cu e presidente di e concurso di MTAI pa asina durante 1 siman brinda un bon bataya pa asina representa nos hendenan di Aruba den gran forma. Jaidy a haci un bunita trabou pa nos isla y a sa di gana e premio di Best National Costume y a keda como Vi Reina di e eleccion na unda cu e corona a bay pa CUBA.

GLW Foundation kier a felicita Jaydi pa su tremendo trabou desplega y ta gradici su mayornan y tambe Endy Croes cu a percura pa semper e luci top tanto den trahenan espectacular como tambe su estilismo y makiyahe. Keda pendiente pa mas di nos candidatanan cu lo biaha pa exterior.



Ultimo Ban Topa na Arnhem ta cera sesion di "brainstorm" cu estudiante



Na Hogeschool van Arnhem y Nijmegen (HAN) Gabinete di Minister Plenipotenciario a tene su ultimo Ban Topa. E encuentro aki tabata pa studiantenan cu ta studia na Arnhem, Nijmegen y Wageningen.

E programa a cuminsa cu un introduccion di directora di Gabinete di Aruba Joselin Croes LL.M/M.Sc. E sesion di "Brainstorm" a keda dirigi pa coordinadora di departamento di Enseñansa, Bienestar General y Cultura Ivonne Navas conhunto cu Joselin Croes.

Mescos cu den e casonan di e otro Ban Topa nan, aki a toca temanan manera e preparacion na Aruba; nan idea y pensamiento riba e tarea di Gabinete di Aruba. Tambe a puntra e studiantenan ki tipo di actividadnan nan ta desea pa keda organisa; kico ta e retonan cu nan a bin ta con-

frontando na Hulanda.

E grupo studiantenan aki mescos cu e otro gruponan a haya pregunta riba cual nan por a duna contesta, pensamiento, remarca, ideanan y sugestionnan unda Gabinete di Aruba lo por sigi traha riba maneho hunto cu ministerio di Enseñansa di Aruba pa stimula e desaroyo y bienestar di studiantenan Arubiano na Hulanda.

Gabinete di Minister Plenipotenciario cu e ultimo Ban Topa na Arnhem por bisa cu tur e encuentronan a brinda Gabinete di Aruba hopi informacion valioso. Joselin Croes a bisa cu aña 2024 tabata uno pa scucha y tende di e studiantenan kico ta nan preocupacionnan, kico ta nan deseo pa yuda nan den nan periodo como estudiante aki na Hulanda. Tambe Sra. Croes a bisa cu algun punto cu a bin dilanti ta puntonan

cu mester keda implementa na Aruba prome cu e estudiante yega Hulanda. Gabinete

di Aruba lo traha riba un lista di prioridatnan pa organisa actividadnan na 2025.

E potretnan ta cortesias di Arubahuis.

VACATURA: Director UNOCA



Fundacion UNOCA, cu tin como meta pa traha na bienestar cultural di Aruba, tin vacatura pa un Director.

E persona aki lo ta responsabel pa maneho diario y pa logra e metanan strategico di UNOCA. E persona ta conseha e directiva na un manera pro-activo tocante asuntonan di maneho, administracion financiero, cuido di calidad di servicio, coordinacion di desaroyo di plan- y proyectonan y ehecucion di plan- y proyectonan. Tambe, e ta lidera e team internamente. Ademas ta representa UNOCA externamente, ta mantene relacion cu instancianan gubernamental, prensa y partnernan.

Requisitonan di e puesto:

- Educacion WO/HBO (Master/Bachelor) den direccion cultural, financiero, economico y/of huridico;
- 3 pa 5 aña di experiencia den un puesto cu ta inclui maneho;
- Dominio di Papiamentu, Hulandes y Ingles;
- Bon conocimiento di tereno y desaroyo cultural di Aruba;
- Conocemento di proceso di gobernacion;
- Habilidad den skirbimento y comunicacion;
- Conocemento di tecnologia digital.

Por manda nos bo aplicacion na info@unoca.aw no mas tarda cu 4 di december 2024.

